

Nema pregovaranja o potpunom poštivanju Mirovnog sporazuma

Dvadeset godina nakon potpisivanja Dejtonskog mirovnog sporazuma, Bosna i Hercegovina može biti zemlja u kojoj se vrijedan rad pristojno plaća, gdje građani mogu podizati svoju djecu u sigurnosti i s dostojanstvom, rekao je danas visoki predstavnik Valentin Inzko, ali do toga će doći samo ako građani uzmu politički proces u svoje ruke.

Visoki predstavnik je održao govor na seminaru o Dejtonskom sporazumu u organizaciji Gradskog univerziteta u Londonu.

“Napredak je apsolutno moguć”, rekao je Inzko. “To smo vidjeli tokom proteklih mjeseci kada su vlasti usvojile Reformski program koji je rađen u saradnji s Evropskom unijom. To je socijalno-ekonomski plan koji ima istinsku šansu da poboljša život bosanskohercegovačkih građana. Program je podržala i međunarodna zajednica koja će pružiti praktičnu pomoć, ukoliko se to od nje bude tražilo. Ako se usvoji i implementira, Reformski program će otvoriti nove mogućnosti za zemlju u cjelini i njene građane.”

Tokom dvodnevne posjete Londonu, visoki predstavnik je razgovarao s visokim zvaničnicima Velike Britanije, uključujući i državnog ministra za evropska pitanja Davida Lidingtona. Visoki predstavnik je istakao da su on i Vijeće za provedbu mira potpuno opredijeljeni da osiguraju poštivanje Dejtonskog sporazuma, čiji su centralni dio suverenitet i teritorijalni integritet Bosne i Hercegovine. Osporavanje Dejtonskog sporazuma znači osporavanje okvira koji je održao mir tokom proteklih 20 godina.